

Grupos de trabajo

Na historia de vida de Nova Escola Galega hai que rexistrar no comezo da asociación a presenza de grupos de traballo docente, como xa se sinalou, en maior medida nas comarcas do Barbanza, A Coruña, Santiago, Vigo, Ferrol, A Estrada, Bergantiños e o Morrazo, chegando a implicar entre os anos 1984 a 1988 un número considerable de docentes. Esta realidade levou mesmo a programar en 1987 cursos sobre Dinámica e Animación de grupos, coa colaboración do Grupo Esnatu de Euskadi, e a realizar en 1987 e 1988 dous específicos Encontros de grupos de traballo de NEG (realizados en Mariñán).

A consolidación de grupos non é sempre doada, ou mesmo pode ser complexa. As modificacións dos cadros docentes de cada centro escolar, das ocupacións docentes, a creación e desenvolvemento das actividades dos Centros oficiais e públicos de formación continuada do profesorado, a propia complexidade da formación docente e o amplo conxunto de cambios que a LOXSE, a LOE, a LOMCE e a actual LOMLOE viñeron supoñendo, fixeron variar o panorama de conformación de Grupos de traballo e de formación e intercambio, cara a unha composición menos "didáctica" e máis temática de grupos desde os finais anos oitenta, reorientándose estes segundo preocupacións que foron modificándose ao longo do tempo.

Con estes antecedentes é do caso facer mención sumaria dos seguintes grupos, algúns dos que deixaron tamén de existir ou reduciron a súa actividade:

- Educación Ambiental: Grupo *Gaia* de Ourense, que a partir de 1994 silenciou a súa actividade.
- Educación pola Paz: Dous grupos situados en Vigo e Ourense, que andando o tempo quedaron refundidos nun só e con participación de asociadas situadas na provincia de Lugo.
- Orientación e titoría: en Santiago con actividade confirmada ata 1996, recuperado en Lugo desde o ano 2000 e durante case unha década.
- Proxectos educativos de Centros na Zona das Mariñas, que decaeu cara a 1998.
- Educación Infantil e Ciclo Inicial, que se localizou en Santiago ao longo de toda a década, que deu paso posteriormente a *Cambela*, que se mantivo ata 2019.
- Pedagogía da Imaxe, na Coruña: activo ata o ano 2000 e con actividade reducida desde ese momento durante varios anos posteriores.
- De Normalización lingüística, desde 1988, con actividade ao longo de distintos períodos. Como tal grupo de traballo recuperouse en 2021.

Cara a fins do anos noventa naceron ou retomaron iniciativas outros grupos:

- De infantil, na cidade da Coruña, desde o curso 1996/97, estabilizado a través do colectivo *Andaina* durante os primeiros anos do século XXI.
- De Educación Secundaria, na cidade da Coruña, con funcionamento entre 1996 e 2000.
- De Escola rural, renovado desde 1998 e posteriormente ampliado mediante unha plataforma concertada que se foi mantendo ata o presente.
- De representantes nos Consellos do CEFO-COP, que funcionou nos anos 1999/2000.
- *Cavila*, de reflexión sobre materias curriculares, en Santiago desde o ano 2001 e que se mantén no presente.
- O *Trinque*, sobre medios audiovisuais e educación, en Santiago, activo durante os primeiros anos do século XXI.
- *Proxecto Terra*, creado no ano 2006, tendo como ocupación central o deseño de materiais didácticos para infantil e primaria e, nalgúns casos, a colaboración en actividades formativas ou de divulgación asociadas ao proxecto do mesmo nome.
- *Vieiros da escola*, activo entre os anos 2006-2010, ocupado na coordinación da publicación de diferentes materiais de aula en formato dixital en colaboración co xornal dixital *Vieiros.com*.



Xunta do Consello de redacción da Revista Galega de Educación.

- Escola de Verán de Ferrolterra, no tempo que se celebraron.
- Revista Galega de Educación. Cun Consello de Redacción que foi variando ao longo do tempo.
- Terra de Melide, que correu coas Xornadas “Ciencia e Territorio”.
- Grupo de Memoria histórica, activo desde 2010 ata o presente.
- Grupo *Fiar Estrelas*, sobre educación, inclusión e interxeracional, desde 2021.
- Grupo Coeducando, desde 2022.

É do caso sinalar que co apoio e participación de asociados de Nova Escola Galega organizanse as Xornadas da Terra de Miranda e algunhas actividades específicas en Ourense e na Ribeira Sacra. Ademais, existiu o Grupo *Enxergo* de Filosofía, que preparaba a colección Editorial “Cadernos de Filosofía”, editada por Edicións Xerais de Galicia, con ampla difusión nos centros de ensinanzas medias de Galicia.



ENCONTRO DE GRUPOS DE TRABAJO

PRIMEIRO ENCONTRO DE GRUPOS DE TRABAJO DE NOVA ESCOLA GALEGA.

Lugar: Pazo de Marián.

Días: 9 e 10 de Maio de 1.987

Na actualidade estase a levar a cabo no seo de NOVA ESCOLA GALEGA un debate, reflexión e intercambio de ideas. Non obstante, cómpre non esquecer a máis próxima situación de precariedade do profesorado en canto á formación permanente. Neste sentido consideramos que se debe seguir potenciando a actividade do traballo dos grupos, fundamentalmente de carácter didáctico.

Cada un dos grupos de traballo contará cun coordinador, que axudará a marcar unha dinámica de traballo.

PROGRAMA

Sábado, día 9

- 11 h. Presentación.
- 12 a 14 h. Grupos de Traballo.
- 14.30 Xantar.
- 16 a 17 . Experiencias.
- 17.30 a 19.30 Grupos de Traballo.
- 20.h. Mesa Redonda: "Dinamización Educativa desde unha perspectiva institucional"(Concellos, Escolas de Maxisterio, Servizo de Orientación, Centros de Recursos, Experimentación Reforma...)

Domingo, día 10

- 10 h. Elaboración de conclusións.
- 12 h. Lectura de conclusións. Valoración das Xornadas e Clausura.

INSCRICIÓNS

Envía-la ficha, canto antes, a NOVA ESCOLA GALEGA, R/Ronda de Velle 103, 11º esqda.15015 A Coruña.

Fina Mosquera resolve calquera tipo de duda relacionado cos Encontros. Teléfono (981) 701003

OBJECTIVOS

- Coñece-las actividades que realizan os grupos de traballo.
- Analisa-la problemática do seu funcionamento, tentando de buscar ideas para melloralo.
- Intercambiar experienciase materiais.
- Facilita-la colaboración entre os distintos grupos.

PLAN DO ENCONTRO

Distribución dos grupos en:

- Preescolar.
- Investigación do medio e Tecnoloxía: Ciencias Sociais, Ciencias Naturais.
- Lingua Galega.
- Educadores pola Paz.

Xunta encontro dos Grupos de traballo de NEG en Marián (1987)